

## LA CAVALO DE GREGORI XI

*En memòri de Jacoulino Baroncelli,  
maridado à Gui Nicolai,  
e de Jehan Baroncelli,  
sarjant d'armo dóu papo Gregòri XI,  
li premié de mi davancié vengu en Avignoun vers 1300.*

Quand lou papo Gregòri XI carguè la tiaro avignounenco di tres courouno, la vilo d'Arle, en lou fasènt coumplimenta pèr si conse e pèr la flour de sa noblesso, i'oufriguè li quatre plus blànquis ego de Camargo que jamai cabassoun e seden an pouscu dounta e atrina au founs di palunaio, quatre cavaloto meravihouso, emé de co tirassarello, de creniero qu'aurias di de sedo, de peitrau large, de cambo musclado e fino e bèn plantado: emblavon de cavalo de mabre. Lou papo, qu'èro un santas, n'en vouguè soulamen garda uno pèr soun usanço. Chausiguè dounc la mai alerto e la mai manso, la mai gaiardo e la mai fino, e faguè douno di tres outro à tres grand persounage: lou cardinau de la Jugìo, que I'avié courouna, n'aguè uno; la segoundo fuguè pèr lou cancelié de la Republico Flourentino, Lucius Coluzzi, qu'èro vengu i'adurre li vot de soun país; e mandè la tresenco au doge de Gèno, Dominico Campo Fregoso, en ié fasènt demanda de secours e de galèro pèr la crousado que voulié alesti contro lou Turc Amurat e li Tartare, aquésti pounchejant, despièi quàuquis annado, alin en Dalmacìo e menaçant d'envahi touto la Crestianta.